

Ultra da la paraid uss era la skizza da Carigiet

■ (anr/fa) A temp per la sessiun d'avust han ins terminà l'ultima etapa da la renovaziun da l'edifizi dal cussegl grond. Nov datti d'admirar er in'ovra d'art dad Alois Carigiet ch'il chantun ha acquistà. Dapi diesch onns vegnì profità da las sessiuns extra muros dal cussegl grond per far lavurs da construcziun necessarias vi da l'edifizi dal parlament grischun. Quai è stà il cas era tar la sessiun a Puntraschigna. Durant ch'il cussegl grond ha salvà là la sessiun da zercladur èn vegnidas terminadas a Cuira las installaziuns tecnicas sco electricitad, climatisaziun e ventilaziun. Il sector da la recepziun e dal secretariat sin il plaunterren che serva durant las sessiuns al manaschi parlamentar ha survegnì, pervia da las prescripziuns tecnicas da la protecziun cunter incendis, ina nova concepziun. En l'entir edificis èn vegnidas renovadas las installaziuns da segirezza. «Ultra da las lavurs da renovaziun han ins pudì realisar in'ulteriura revalitaziun da l'edifizi dal cussegl grond», ha ditg mesemna il president da la regenza grischuna *Jon Domenic Parolini*.

«Ina skizza detagliada da la pictura da paraid»

Sin proposta dal deputà al cussegl grond *Bruno Claus* (pld, Cuira) ha il chantun Grischun profità da l'occurasiun per acquistar ina skizza detagliada e formulada tar la pictura da paraid «L'uniun da las Trais Lias, 1959» dad Alois Carigiet (1902–1985) en l'edifizi dal cussegl grond. Quel acquist ha custà 26 500 francs. Ultra da las natiras mortas, vistas da vitgs e motifs figurativs ha l'artist gri-



Cussegljer guvernativ Jon Domenic Parolini ed il deputà Bruno Claus rendan attent a detagls da la skizza da l'artist Alois Carigiet.

FOTO F. ANDRY

schun stgaffi per incumbensaders publics e privats er numerusas picturas da paraids. L'exempel probablmain il pli enconuschent è la pictura da paraid da sis sin 14 meters en la sala dal parlament grischun ch'el ha terminà l'onn 1961. Quella mussa in sper l'auter differents eveniments da l'istorgia grischuna. «La cumpira e la preschentaziun da la skizza da la

pictura da paraid accentueschan l'impurtanza artistica da questa ovra e salvan per il public in document impurtant da noss origins», ha ditg Parolini. «Uschia han ils interessads ed era scolaras e scolars la pussaivladad da cumparegljar la skizza ch'è exposita sin l'emprim plaun da l'edifizi dal parlament grischun cun l'ovra vi da la paraid en la sala dal cussegl grond», ha

declerà Claus e menziunà in detagl: Sin la skizza aveva picturà l'artist intgins capricorns en cursa. «Forsa ch'insatgi ha rendì attent l'artist che quai sajan per il Grischun ils animals ils pli impurtants», ha manegià Claus, «sin la paraid en sala dal parlament ha malegià Carigiet ils capricorns en posiziun bainquant pli maiestusa.»